

序

國有史郡邑有志紀載雖殊所
係之重一也周禮大司徒掌天
下輿囿司馬掌職方小史外史
掌邦國四方之志唐李吉甫作
元和郡縣志及國計簿謂爲政

者執此可治天下夫宰相治天下以是爲重守令治一郡一邑何獨不然今夫事之垂世傳遠者有初必有繼有創必有修未可忽而不爲或憚而爲之不力也忘乘特其一端耳雖然難言

之矣制屢更而屢變跡愈久而
愈湮散棄荒忽在所不少難一
或隨事雜錄漫無別裁其失蕪
或騁才華矜淹博標目風景侈
陳金石其失濫蕪與濫並乖謹
嚴之旨難二昔人謂士大夫平

日不肯作上志書事及修志書
則人人爭要上秉筆者不能不
寄權於採訪偶未精察便非實
錄難三兼此三難而求克有攸
當非具學術而識政體者不能
伊邑志書創始於胡公續修於

孫謝崔三公乾隆三十一年吳
門李西谷先生宰是邑取舊志
之繁者刪之誤者正之略者補
之不支不蔓無黨無偏其諸不
辭難而欲得當者歟至於今七
十餘載矣凡戶口之生息風俗

之移易物產之盈縮人材之輩
出吏治之臧否城垣廨宇之修
築與夫祥異水旱之在天孝弟
節烈之在人靡不日增歲異及
今不輯則大者疑信叅半小者
湮滅無聞後之人即欲遠稽遐

考其奚從而徵之爰不揣固陋
聘名士集邑紳分司纂校予於
簿領之暇共佐鉛槧搜採維勤
考訂維慎甄覈維公自夏徂冬
乃訖厥事其體例較李志略有
變通非立異也亦韓詩外傳所

謂不貴苟難之意爾書成識其
梗概於簡端

道光十有八年歲次戊戌仲冬
月伊陽縣知縣張道超書

伊陽縣志原序

僕東海下走筮仕之始承乏伊陽仰見功令之嚴而諸憲
臺釐剔之至惠養斯民之切蓋罔不夙夜兢惕凜凜乎覆
餗是懼乃貿貿然來見夫城小而完民稀而樸士貌古而
神靜以爲殫厥心焉庶幾稱職之易及受事焉而深歎其
艱也曷難乎爾憲檄諄復者招徠乃有招徠之名而無招
徠之實以招者旣來復去之衆非能於戶口之外新集流
亡也憲檄諄復者開墾乃有開墾之名而無開墾之實以
墾者旣熟復荒之地非能於榛莽之墟廣闢田疇也外此

而庭可羅雀者民貧無事之可爭非形清政簡使之無訟也巷無吠犬者糧少無逋之可追非寓撫於催使之不足也自是四達之流渠不濬五都之貿遷不興菁莪之人文不蔚卽曰惴惴夙夜何裨於茲土而不懼覆餗乎所幸者諸憲臺洞悉民隱俯察時艱取伊之民而噢咻之取伊之吏而寬勸之以是得以黽勉從事而徐徐焉喘息也茲奉憲檄纂修伊志伊邑之舊志無存矣伊邑之新聲未著矣延訪名碩得之常劉兩先生見聞之所及者彙爲一書呈附省郡之末因思僕以憔悴拊循之時得與於文獻洋洋

之盛又不可不爲厚幸也而其所以克圖報效者將安在
乎古訓曰太平之吏惴惴無華日計不足月計有餘是僕
所當厯懷也夫而爾士民之所以上答

高厚者又將安在古訓曰瘠土之民勞勞則思義思義則善心
生是爾士民所當厯懷也夫夫富盛亦何常之有十年生
聚十年教訓民亦可衆邑亦可大也僕烏敢以甘自菲薄
者菲薄爾士民而爾士民又烏可以甘自菲薄者菲薄夫
僕乎哉是爲序順治己亥冬月上浣之吉東海孫光燾拜

手題

伊陽縣治設于明成化十有一年距今數百餘歲其先掌
故無存遺事莫考迄順治己亥中丞賈公始有纂修之舉
又康熙庚午中丞閻公復檄令續修前令魏君之京董其
事書成甫上旋蒙駁易會魏君以丁憂去余待罪承乏遂
不獲辭弇陋與邑紳士殫力蒐討刪蕪補闕凡三閱月而
其役始竣方繕寫呈覽適中丞有撫黔之行遂以中止茲
蒙今大中丞顧公檄下取閱益懼荒陋無當宗工復與諸
紳士重加校讐錄帙旣成因系一言於其端曰夫志之爲
書卽古國史之遺也古者一國有一國之史太史采風以

觀土俗之美惡以考政治之得失後世因之而出省以至
郡邑莫不有志舉凡封域之廣狹營建之興廢賦役之輕
重以及學校之崇替人才之盛衰人物風華之可以表今
而傳後者胥於是乎見焉此作志之大畧也雖然抑有難
焉夫庸陋鄙僂言而無文則表章之難也侈張靡麗無當
撫實則徵信之難也言或文矣事或實矣而法戒未昭勸
懲罔裨因革損益未能斟酌而盡善則作法之難也三者
有一未備其書不足存矣予顧何人敢叨斯任然以吾自
揣蹈虛而文則不能撫實而陋則猶可勉也今伊雖僻處

豫壤兵燹殘區而考其山川人物徵其物產土宜他邑之所有者伊未嘗或乏焉宰是邑者審其利弊相其緩急著之爲令以宜民而善俗則固可冀然而成一書也於是先之以封域終之以藝文庶幾三卷義略加詳若夫綜貫條綱興起教化成厥大觀則予謝不敏矣康熙三十三年孟秋之吉知伊陽縣事西陵謝夢弼坦菴氏題

郡邑之有志固一代之文獻所由闢而損益之所由出也雖所載者不過提封四境之內而治道之源流世運之變遷所以信今傳後上之可登職方下之可藏石室而證千

百年之龜鑑者莫不取資於是伊邑舊志創修于順治己亥間閱三十餘歲至康熙甲戌邑令謝君始重修之迄今五十餘年未獲續訂辛酉春余蒞任茲土披覽之下每不能無缺畧不備之憾焉竊思此數十年來

聖恩之涵育撫摩而盤結於人心者已遞深三世矣太平之翔洽仁義之漸漬固已淪肌浹髓而大澤疊沛亦多經前古所未有以祀典言之或隆奉五代或崇封三世或重民事而立先農壇或禦民災而建將軍祠他如忠孝節義之祀所以勵民風而崇教化者莫不爲千載之曠典宜悉志之

以垂不朽而邑乘有闕焉推之養廉以嚴官守選舉以廣仕途蠲免之詔屢下養老之制頻頒令丁糧以紓貧民設養濟以惠孤窮美意良法指不勝屈一時各上憲加意綏懷德教所及莫不風移俗易而志均未之及其將何以昭法守哉而且戶口之殷繁田賦之漸加人文之蔚起義士節婦之懿德善行又復纍纍可紀而名實不符尙且任其湮沒焉亦何賴此志爲卽以舊志所載如通惠等渠水利攸關今所存者不過十之一二則其中之變更不同者又烏可勝道耶而其他所遺佚者抑又可知矣家君以癸卯

進士任江西贛縣令曾纂修邑誌淇赴伊之始卽首以振興文教爲訓今乃聽其殘缺心殊有所未慊歲壬戌州憲宋公德著謳歌望隆保障於整飭吏治之餘復欲重修郡邑志以昭人物之盛檄所屬縣各修邑志余仰承續增之令遂欣然不辭爰敦延邑紳拔貢生申爾宣等倡議重訂幸諸紳士莫不踴躍樂從擇吉清和之旣望設館隍廟之後楹廣搜博採協力續修凡前志所載悉準舊例間有差訛漸加訂正其於今昔有無廢興之間或諒爲參酌或晰著欸下條分縷析以備考閱惟